



Rapport annual 2022 GIUVNETETGNA CADI

Tgei interessescha las lecturas ed ils lecturs che legian nies rapport annual? Quei ei la damonda che jeu tschentel a memezza mintg'onn. Buca scriver memia bia e buca memia lungurus, denton tuttina informativ e cumplet. Quei ei mia sfida ed jeu selegrel da saver scriver sur dallas activitads digl onn 2022 che la lavur aviarta GIUVNETETGNA CADI ha purschiu als giuvenils e giuvens carschi dallas vischnauncas Tujetsch, Mustér, Medel, Sumvitg e Trun.

Locals da sentupada

Local Talina a Sedrun, avertura il venderdis sera

Ella Talina vegnan ils giuvenils bugen, era giuvenils da Mustér selegran da visitar la Talina. Las renovaziuns ella Stanza1 - nua ch'ins sa dar da niev bigliard - ein sin buna via. Dapi il november san giuvenils e giuvens carschi far diever da quella purschida. La gruppa da lavur dils giuvenils ha dau colur il plantschium e dismiss ils rumians. Ils luvriers da vischnaunca ed il gerau Daniel Schmid han priu a mauns il transport e l'installaziun dalla meisa da bigliard. Per astgar entrar ella Stanza1 ein dus meinagruppa, ni ils/las menaders*as responsabels. Els han da controllar ch'ills/las visitaders*as setegnien vid las reglas. Gjuvenils 16+ e giuvens carschi astgan far diever da quella stanza era ordeifer il temps d'avertura dalla TALINA.



02-11-2022 giuvenils, gerau Daniel Schmid e luvriers da vischnaunca han transportau e montau la meisa da bigliard en Stanza1 a Sedrun

Local Cons a Mustér, avertura il venderdis sera

Igl onn 2022 ein neginas novas menadras ni menaders s'engaschai per far survetsch el local Cons. Il zercladur han 4 menaders calau, e 4 ein restai vinavon pigl onn da scola 2022/23.

Local Pistregn a Surrein avertura il venderdis sera

Igl onn 2022 ha ei dau dapli visitaders*as el local Pistregn. Ils/las menaders*as ein motivai ed ils giuvenils saultan e contan cun plascher. 3 menadras han calau cul survetsch da far survigilonza il zercladur 2022. Nus havein denton astgau far beinvegni a 4 novs menaders, quei fa secapescha grond plascher. Nies fidau manischunz da taxi, Eugen Demont, fa gia dapi onns il transport culs giuvenils dalla vischnaunca da Trun e Sumvitg, era igl onn 2022 hai dau negins incaps.

Projects

Il projects che GIUVNETETGNA CADI porscha durant il temps liber promovan las cumpetenzas socialas dils giuvenils. Las porschidas ston denton corrispunder agl interess dils giuvenils, dar peisa alla prevenziun, esser informativs ed era far plascher allas participontas ed als participonts.

Halla aviarta

Nus entschevein cun quella porschida mintgamai suenter las vacanzas d'atun e terminein cullas vacanzas da primavera. Ils giuvenils san ir 2 gadas al meins a Trun ni a Rabiun en halla per dar giugs. Nos menaders*as empaleschan quellas sentupadas e motiveschan ils giuvenils da semuentar. Igl uffeci da sanadad dil cantun Grischun sustegn quei project finanziamein e cun proscher cuors da formaziun.

Audienza

Las restricziuns da stuer purtar mascrina ein vegnidas abolidas ed jeu hai puspei astgau veser las fatschas dils giuvenils. La mesjamna suentermiezdi visetan scolaras e scolaras quella porschida en tgèsa communal a Sedrun, ni el local Cons a Mustér. Las frequenzas ein s'augmentadas marcantamein. Per regla vegnan tochen 16 giuvenils a Sedrun ed entuorn 12 a Mustér. Bi ei che giuvenils da Mustér vegnan a Sedrun e giuvenils da Tujetsch a Mustér.



09-02-2022 giuvenils che gaudan la bun'aria tuatschina durant l'audienza a Sedrun

Participaziun d'affons e giuvenils ellas vischnaucas dil Grischun

Jugend.gr ha iniziàu il project dall'Unicef ed accumpignau GIUVNETETGNA CADI durant varga dus onns. La fundaziun «Mercator Schweiz» ha finanziàu quei project. Las meinaprojects employadas tier jugend.gr, Chantal Bleiker e Flurina Spreiter han fatg retschercas e luvratoris culs responsabels dallas vischnaucas, en scolas, tier la giuvenetgna ed era organisau e menau atras luvratoris cun la cumissiun da GIUVNETETGNA CADI. Il resultats vegnan publicai igl onn 2023.

Contact cullas scolas

Astgar presentar il post da GIUVNETETGNA CADI allas scolaras e scolaras dall'emprema superiura ei fetg impurtont. Quei hai jeu astgau far a Sedrun, a Mustér ed a Trun. Grand plascher fa ei a mi sch'jeu vegnel envidada alla sera da geniturs per saver presentar las porschidas, las reglas e co la finanziaziun dil post ei reglada.

Projects realisai

Ils 15-01-22 a Mustér: Patinar, hockey sin patinera, sunter preparar e magliar da cuminonza raclette el center AUA VIVA

Ils 03-03-22 a Dieni: Scursalada nocturna

Ils 12-03-22 a Mustér: Cuschinar e magliar tratgs dall'India cun nos augsegners e cul plevon reformau, referat sur dalla tiara oriunda da nos augsegners

Ils 01-04-22 a Mustér: Segidar cun rimnar uorden e resti per l'Ukraina, ils giuvenils fan survetsch alla staziun e caveglian igl uorden rimnau

Ils 07-05-22 a Mustér ed a Sedrun: In di culs pumpiers Sursassiala, era 3 giuvenils dall'Ukraina ein separticipai

Ils 11-05-22 a Mustér: Viseta e brat culs gimnasiasts dil gimnasi «Hohe Promenade» da Turitg. Lur scolast Daniel Monn vegn adina puspei el local Cons cu el ei en tiara romontscha. In motiv ei da puspei udir il lungatg romontsch e d'udir musicistas e musicists che perfuorman en quei lungatg

Ils 01-06-22 a Sedrun: Co eis ei da viver sch'ins ei tschocs? Dunna Berther raquenta

Ils 11-06-22 a Cuera: Dar il giug «Paintball»

Ils 13-08-22 a Mustér: Separticipar alla fiasta dil vitg cun in stan da vender drinks senza alcohol ensemen cun la fundaziun «Tür auf-mo vinavon»

24-08-22 a Mustér: Sera da film e discussiun «Platzspitzbaby» ensemen cul plevon reformau

06-09-22 a Trun: En collaboraziun cugl uffeci da sandadad dil cantun Grischun, «Gie ei gie, na ei na!», prelecziun da René Schnoz ord il cudisch «Nachts im Dunkeln» da Valentin Vincenz. Sera publica ensemen culla biblioteca Trun ed il post dil fatg Aidshilfe Graubünden tiel tema abus sexual. La sera ei vegnida menada per romontsch e tudestg

14-09-22 a Mustér: En collaboraziun cugl uffeci da sanadad dil cantun Grischun e la pleiv evangelica reformada dalla Cadi sera da brat: «Jeu sun ord scola, e lu?», living library. Ina persuna pensiunada, ina persuna da ca. 50 onns, in giuven bab da famiglia ed interprendider, duas giunvnas ed in giuven raquentan sur da lur experientschas e tgei ch'ei semidau dapi ch'els ein ord scola.

02-10-22 a Magadino: Ir cun Go-Kart

09-11-22 a Sedrun: Cuors da bigliard cun Simon Beer e Sandro Cavegn

26-12-22 a Mustér: Menadras meinan la bar a caschun dalla «Disco per carschi dallas generaziuns 35+»



07-05-22 In di culs pumpiers a Sedrun



24-08-22 fiasta dil vitg a Mustér



06-09-22 Prelecziun ella biblioteca Trun

Colligiazion e formaziun

Sco menadra dil post da lavur da giuventegna aviarta, GIUVNETETGNA CADI, sun jeu separticipada e s'engaschada denter auter tiels suandonts projects regionals e cantunals.

18-01-22 **Avegnir Surselva**, definir puncts impurtonts per ina regiun cun potenzial pil futur

14-05-22 **Forum Diakonie/Sozialarbeit** a Cuera

16-05-22 Terminau cuors ed examen: **Ensa Erste Hilfe Fokus Jugendliche**

05-09-22 Collaboraziun tiel project catunal: **strategia cantunala tier dependenzas**

27-10-22 **Agir tier surpassaments da cunfin, Bündner Standard**

Cumissiuin 2022:

Christoph Zingg, meinafatschenta dalla fundaziun «Tür auf-mo vinavon»

Daniel Schmid, president dalla cumissiuin, delegau dalla vischnaunca Tujetsch

Gabriel Venziun (tochen il zercladur) Claudio Simonet, delegau dalla vischnaunca Medel

Jris Lombris, delegada dalla vischnaunca Mustér

Robert Candinas (tochen il zercladur) Gion Huonder

Kurt Wolf, delegau dalla vischnaunca Trun

Senza il sustegn finanziel dallas vischnauncas, dalla baselgia cantunala catolica grischuna e dalla baselgia evangelica reformada savessan nus buca porscher quellas activitads a nos giuvenils. In sincer «engraziel fetg» a vus che possibiliteis quella lavur per e cun nos giuvenils e giuvens carschi en nossa regiun.

Per GIUVNETETGNA CADI

menadra dil post da lavur da giuventegna: Gabriela Cabalzar-Lombriser